

WILLIAMS, RICHARD (1835 - 1906), hynafiaethydd, hanesydd, a chyfreithiwr

Enw: Richard Williams

Dyddiad geni: 1835

Dyddiad marw: 1906

Priod: Elizabeth Williams (née Lewis)

Priod: Frances Williams (née Brown)

Rhiant: William Williams

Rhyw: Gwryw

Galwedigaeth: hynafiaethydd, hanesydd, a chyfreithiwr

Maes gweithgaredd: Hanes a Diwylliant; Cyfraith

Awdur: William Emyr Williams

Ganwyd yn Bontdolgadfan, Llanbryn-mair, mab [William Williams](#) ('Gwilym Cyfeiliog'). Addysgwyd ef yn ysgolion Llanbryn-mair a'r Drenewydd ac yn academi'r Bala (o dan ofal [Dr. Lewis Edwards](#) a [John Parry](#)). Yna gweithiodd yn swyddfeydd y cyfreithwyr David Howell, Machynlleth, 1851-6, ac Abraham Howell, Trallwng, 1856-69; fe'i derbyniwyd yn gyfreithiwr yn 1866. Symudodd i'r Drenewydd yn 1869 ac yno y treuliodd weddill ei oes. Bu'n briod ddwywaith - (1) â Frances Brown (2) ag Elizabeth Lewis, y Rhyl. Bu'n flaenor ffyddlon yng nghapel y Crescent. Daliai amryw o swyddi cyhoeddus ac ef oedd trefnydd yr ymgeisydd Rhyddfrydol, [Stuart Rendel](#), a etholwyd yn aelod seneddol yn 1880 - yr aelod Rhyddfrydol cyntaf mewn cof dros Sir Drefaldwyn. Cyhoeddodd *Montgomeryshire Worthies*, 1884; ail arg. [1894](#) [↗](#); *History of the Parish of Llanbryn-mair*, 1889, ac erthyglau ar hanes a hynafiaeth ei sir enêdigol. Golygodd *The Royal Tribes of Wales*, 1887, gyda nodiadau llawn o'i waith ei hun; *Caniadau Cyfeiliog*, 1878, a'r *Mabinogion* mewn Cymraeg hen a diweddar (cyhoeddwyd gan [Isaac Foulkes](#) 1880). Cyfieithodd *Draethodau* Bacon yn Gymraeg, 1862. Cyfrannodd i *Bye-Gones* a'r *Geninen*. Yr oedd yn un o sylfaenwyr y Powysland Club ac yn gydolygydd y *Transactions and Records*. Casglodd lyfrgell werthfawr ac ar ei farw fe'i pwrcaswyd trwy garedigrwydd y diweddar [arglwydd Davies](#) o Landinam, a'i throsglwyddo i Lyfrgell Genedlaethol Cymru fel un o'r casgliadau sylfaenol o dan yr enw 'Celynog Collection.' Bu farw 15 Mehefin 1906 Drenewydd, 'yn 71 oed.'

Awdur

William Emyr Williams, (1889 - 1958)

Ffynonellau

Handlist of Manuscripts in the National Library of Wales, ii,etc. (gw.y fynegai)

Archifau LIGC: [Bontdolgadfan \(Williams family\) Papers, 1741-1920](#)

Dolenni Ychwanegol

VIAF: [16999258](#)

Wikidata: [Q20734308](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

